



Liun Leuenberger.



Hans-Rudolf: In tschess privlus u be in «Pleitegeier»?



Micheline è in strut.

Bun di dunna Calmy-Rey

Set ministers federals stattan guardia di e notg a Flem

DA CLAUDIA CADRUVI / ANR

■ L'emprim n'hai jau gnanca fatg stim dals set cumpogns da fier sin l'areal dal Hotel dal Parc. Fin ch'in collega m'ha fatg attent: «Has vesi ils set cussegliers federals che l'artist sursilvan Samuel Inauen ha fatg per la sessiun a Flem?» L'emprim inscuntr'jau la scultura «Micheline». Cura ch'jau guard ad ella en fatscha vegn jau en empruvament da dir «Bun di, dunna Calmy-Rey». La sumeglientscha na po naging snegar. Sche nosa ministra per l'exteriur fiss da fier, vess ella or exact uschia.

Ushiglio è «Micheline» in strut. Sias alas ha l'artist fatg cun plats-criecs. Gnanca uschè mal l'idea: La ministra da l'exteriur sto gea savens arar il diraglia terren da la politica «neutrala» svizra.

Christoph, il pitschnuchel

E tgi è quest tschierv là? Avant il center da medias stat ina scultura cun cornas – in «Platzhirsch». Ins na sto gnanca le-

ger la tabla, per savair tgi ch'igl è. Vi da la levza penderlonta enconusch'ins immediat il schef dal departament per giustizia e polizia.

Betg sulet cun la levza ha l'artist tutgà la noda, mabain era cun la statura. I sa tracta d'in tschierv plitost pitschen, e Christoph Blocher sez è gea era plitost in pitschnuchel.

Sämi, il pauper toc

Samuel Schmid n'enconusch'ins betg immediat. Inauen ha furmà el sco elefant cun num «Sämi». Ma sch'ins contempla in mument sia fisionomia, chatt'ins plaunsieu ils tratgs dal schef dal departament da militar.

Il pauper elefant cuchegia da quai schenà atras ses eglers. Sco sch'el less ch'ins na fetschia betg memia grob cun el. Jau lasch cunbun il pauper «Sämi» e vom a la tschertga da ses collegas.

Pascal e Moritz

Avant la Villa Silvana stattan ina ghiraffa ed in liun. La ghiraffa ri cun bucca

averta. Igl è il surrir da Pascal Couchepin. Las ureglias ha l'artist fatg cun tschaduns ed il nas consista d'ina sgrattirola.

Amez la chavallera dal liun sa chatta ina fatscha fina, sco quella da Moritz Leuenberger. La fatscha è fatga cun ina furma da pettas, e las toppas da furmas per pettas pitschnas. Tgi che visita «Moritz» duess far stim d'in detagl: il puschel da fils-fier a la fin da la cua.

Hans-Rudolf e Doris

Ils dus ultims cussegliers èn utschels. «Hans-Rudolf» è in tschess – per tudestg probabel in «Pleitegeier». La scultura fa dapli respect ch'il vair Hans-Rudolf Merz. Las alas èn fatgas da ristes-fier e las greflas cun tardens.

«Doris» regorda ad in'anda innocenta. Ma l'anda posseda alas da plats-fautsch. Perquai èsi da cussegljar d'avair in pau respect da «Doris» e da tegnair distanza. Speranza na vala quai betg sulet per la anda da fier en il Parc da Flem, mabain era per la Doris Leuthard, la pli giuvna cussegliera federala.



L'anda «Doris».



Il pauper «Sämi» è schenà ed ha ina massa quitads.



Tgenin cusseglier federal ha ina tala levza?



La giraffa ha num Pascal.